

दिनांक 13.10.2025

समय: 18.45 बजे

आकाशवाणी जयपुर-अजमेर

समाचार

- केंद्रीय गृह मंत्री अमित शाह लारला साल लागू करी ज्या तीन नुवा आपराधिक कानूनां ने ईज ऑफ जस्टिस री ओर खास कदम बतायो—9 हजार 300 करोड़ रुपया ऊं बत्ता खर्च वाळा विकास रा कामां रो शिलान्यास अर लोकार्पण कीनो ।
- बारां जिला री अंता विधानसभा सीट माथे उपचुनाव सारू अधिसूचना जारी—पहला दिन कांग्रेस रा उम्मीदवार प्रमोद जैन पर्चो दाखिल कीनो ।
- रेल मंत्री अश्विनी वैष्णव रेलवे सुरक्षा बल—आर पी एफ मांय सालाना आधार ऊं भर्ती रो ऐलाण कीनो ।

अर

- श्रम अर रोजगार मंत्रालय कर्मचारियां री सामाजिक सुरक्षा रो दायरो बधावण सारू कर्मचारी नामांकन अभियान चलावेला ।

000

केंद्रीय गृह मंत्री अमित शाह कह्यो है के लारला साल लागू करी ज्या तीन आपराधिक कानूनां ऊं देश मांय तुरत, आसान अर सरल तरीका ऊं न्याय मिलण लाग्यो है । वे नुवा आपराधिक कानूनां रे लागू व्हेवण रो एक साल पूरो व्हेवण रे मौके आज जयपुर मांय लगायी ज्यी राज्य स्तर री प्रदर्शनी रा उद्घाटन जळया मांय बोल रह्या हा । श्री शाह कह्यो के अ कानून ईज ऑफ जस्टिस— आसानी ऊं न्याय मिलण री दिशा मांय खास कदम है । गृहमंत्री कह्यो के अ कानून लंबी चर्चा अर केई लोगां रा सुझाव अर मंथन पाछे लागू करी ज्या । श्री शाह आं कानूनां री खासियत रो जिकर करता थकां कह्यो के आं मांय महिलावां अर बच्चां रे खिलाफ व्हेवण वाळा अपराधां रा मामलां मांय खास प्रावधान करी ज्या है ।

श्री शाह कह्यो के आं कानूनां मांय पीड़ित लोगां ने टेमसर न्याय दिरावण रा प्रावधान करी ज्या है । वे कह्यो के अ कानून लागू करणो 21वीं सदी रो सब ऊं खास बदलाव है ।

श्री शाह जनता ऊं देशी सामान री खरीदी करण री अरज कीनी। वे कह्यो के देशी सामान काम लेवण ऊं देश मांय उत्पादन बधेला, जिण ऊं भरत ने साल 2047 ताई विकसित देश बणावण रो संकल्प पूरो करण मांय मदद मिलेला। श्री शाह कार्यक्रम रे दौरान राजस्थान ग्लोबल इन्वेस्टमेंट समिट 2024 मांय मिल्या निवेश रा प्रस्तावां मांय ऊं 4 लाख करोड़ रुपया रा करार माथे काम सरु करण सागे करीब 9 हजार 300 करोड़ रुपया ऊं बत्ता रा विकास रा कामां री नीव रखी अर पूरा व्ह्या काम जनता ने संप्या। वे राज्य मांय सरकारी स्कूलां रा विद्यार्थियां ने स्कूल ड्रेस मुहैया करावण सारु 260 करोड़ रुपया अर दूध उत्पादकां ने दूध सब्सिडी रा 364 करोड़ रुपया री रकम ई भेजी। कार्यक्रम मांय मुख्यमंत्री भजन लाल शर्मा कह्यो के प्रदेश मांय कानून रो राज चलावण अर अपराधियां रे खिलाफ करड़ी कार्रवाई सारु राज्य सरकार पुलिस व्यवस्था ने और बेहतर बणावण सारु केई जतन कीना है, ज्यां मांय एन्टीगेंस्टर टास्क फोर्स अर एन्टी नाकॉटिक्स टास्क फोर्स शामिल है।

कार्यक्रम मांय राजस्थान हाईकोर्ट रा कार्यवाहक मुख्य न्यायाधीश न्यायमूर्ति संजीव प्रकाश शर्मा कह्यो के तीन नुवा आपराधिक कानूनां ऊं देश री न्याय प्रणाली तेज अर आधुनिक बणी है। वे कह्यो के राजस्थान हाईकोर्ट कानी ऊं नुवा आपराधिक कानूनां रा तैत नियम अर अधिसूचना जारी कर र आं ने लागू करणो तैय क्यो जा रह्यो है।

000

बारां जिला री अंता विधानसभा सीट माथे उपचुनाव सारु आज अधिसूचना जारी कर दीरीजी। ई सागे ई नामपाना दाखिल करण रो काम सरु व्हे ग्यो। आज पहला दिन कांग्रेस रा उम्मीदवार प्रमोद जैन पर्चो दाखिल कीनो। उम्मीदवार 21 अक्टूबर ताई पर्चा दाखिल कर सके है। 23 अक्टूबर ने नामपाना री जांच करी जावेला अर 27 अक्टूबर ताई नाम पाछा लिया जा सकेला। 11 नवम्बर ने वोट पड़ेला अर 14 नवम्बर ने वोटों री गिणती करी जावेला।

000

वाणिज्य अर उद्योग मंत्री पीयूष गोयल कह्यो है के पीएम गतिशक्ति, एकीकृत योजना अर क्षेत्र आधारित विकास रा प्रधानमंत्री नरेन्द्र मोदी रा नजरिया ने सांचो करे है। वे नई दिल्ली मांय पीएम गतिशक्ति राष्ट्रीय मास्टर प्लान री चौथी वर्षगांठ रे मौके राख्यी ज्या कार्यक्रम मांय बोल रह्या हा। श्री गोयल पीएम गतिशक्ति रा तैत पीएम गतिशक्ति सार्वजनिक मंच, पीएम गतिशक्ति ऑफशोर अर एनएमपी डेशबोर्ड समेत केई पहलां री सरुआत कीनी। ई मौके वाणिज्य अर उद्योग राज्यमंत्री जितिन प्रसाद कह्यो के पीएम गतिशक्ति ऊं मंत्रालयां अर राज्यां बीचे मिल र बेहतर तालमेल सागे काम करण री परिपाटी सरु व्ही है।

000

केंद्रीय शिक्षा मंत्री धर्मेन्द्र प्रधान आज दिल्ली मांय विकसित भारत बिल्डअथॉन-2025 रो उद्घाटन कीनो। ई मौके वे कह्यो के 21वीं सदी री अगुवाई करेला। देशभर रा तीन लाख ऊं बत्ती स्कूलां अर 25 लाख ऊं बत्ता विद्यार्थी अर शिक्षक बिल्डअथॉन मांय वर्चुअल तरीका ऊं शिरकत कीनी।

देशभर मांय विकसित भारत बिल्डअथॉन-2025 अटल नवाचार मिशन अर नीति आयोग री मदद ऊं शिक्षा मंत्रालय री ओर ऊं राखी जा रही है।

000

रेल मंत्री अश्विनी वैष्णव कह्यो है के कर्मचारी चयन आयोग रेलवे सुरक्षा बल —आर पी एफ मांय सालाना आधार ऊं भर्ती करेला। वे आर पी एफ ने नुवी तकनीक वाळी बणावण ऊं जुड़ी केई पहलां री सरुआत कीनी। रेल मंत्री रेलवे सुरक्षा बल रा 41वां स्थापना दिवस रे मौके गुजरात रा बलसाड़ मांय राखी ज्या कार्यक्रम मांय बोल रह्या हा। श्री वैष्णव आर पी एफ कर्मचारियां ने बेगा ई वी एच एफ सैट मुहैया कराया जावेला अर वां ने झोन ऊं जुड़ी सिखावण री दी जावेला।

000

सरकार कर्मचारियां री सामाजिक हिफाजत रो दायरो बधावण सारु कर्मचारी नामांकन अभियान चलायो है। श्रम अर रोजगार मंत्रालय रे मुजब ओ अभियान ई साल एक नवम्बर ऊं आवता साल 30 अप्रैल ताई चालेला। मंत्रालय रे मुजब पहली जुलाई 2017 ऊं 31 अक्टूबर, 2025 बीचे नौकरी लागण वाळां रा नाम मंडाया जा सके है।

000

केंद्रीय विधि अर न्याय मंत्री अर्जुन राम मेघवाल आज बीकानेर रा मुक्ता प्रसाद नगर मांय सामुदायिक स्वास्थ्य केंद्र रो उद्घाटन कीनो। ई मौके वे कह्यो के ऋषि-मुनि अर संत निरोगी काया ने पहलो सुख बतायो। वे कह्यो के स्वस्थ शरीर मांय स्वस्थ मन बसे है।

000

सिरोही जिला रा आबूरोड़ मांय ब्रह्माकुमारीज संस्थान मांय राखी ज्यो अंतर्राष्ट्रीय सम्मेलन आज पूरो व्हे ग्यो। इण रा समापन जळसा मांय केंद्रीय कानून अर न्याय मंत्री अर्जुनराम मेघवाल अर केंद्रीय राज्य मंत्री दुर्गादास उइके ई शामिल व्ह्या। सम्मेलन मांय देश-परदेश ऊं आया लोग **‘एकता और विश्वास’** मुद्दा माथे चर्चा कीनी।

000

अजमेर रा सरकारी जवाहरलाल नेहरू अस्पताल रा विकास सारु राज्य सरकार एक सौ इक्यानवें करोड़ रुपया मंजूर कीना है। विधानसभा अध्यक्ष वासुदेव देवनानी आ जाणकारी दीनी। वे बतायो के ई रकम ऊं अस्पताल मांय नुवा सुबीतां रो सुपर स्पेशलिटी ब्लॉक बणायो जावेला। अस्पताल रा अधीक्षक डॉक्टर अरविंद खरे बतायो के हाल ताई पीडियाट्रिक अर मेडिसन विभाग रा ब्लॉक बण गया है।

0000

केंद्रीय संस्कृति अर पर्यटन मंत्री गजेन्द्र सिंह शेखावत आज बीकानेर मांय लारला दिनां देवलोक व्ह्या कांग्रेस रा नेता रामेश्वर डूडी ने सिरधाभाव सागे याद कीना। ई मौके वे कह्यो के डूडी जनता रा सच्चा नेता हा, जो किसानां सारु लड़ाई लड़ी। केन्द्रीय मंत्री महाराजा गंगा सिंह ने ई वां री पुण्यतिथि रे मौके सिरधाभाव सागे याद कीना।

000

श्रीगंगानगर ज़िला मांय ई साल चोखो मेह व्हेवण रे कारण 7 लाख 10 हजार हेक्टेयर ऊं बत्ता हलका मांय बुआई रा आसार है। इण ने ध्यान राखता थकां खाद री कालाबाज़ारी अर तस्करी रोकण सारू पंजाब–राजस्थान अर श्रीगंगानगर–बीकानेर सरहद माथे चौबीस ई घंटा काम करण वाळी सात चैक पोस्ट बणायी ज्यी है। ई रे अलावा ज़िला री 17 मण्डियां मांय खाद मुहैया करावण री व्यवस्था माथे निगराणी सारू प्रभारी अहलकारां री नियुक्ति करीजी है।

000